

Inatsissatut siunnersuummut oqaaseqaatit

### **Oqaaseqaatit nalinginnaasut**

#### 1. Inatsimmut siunnersuutip tunuliaqutaa

Siunnersuut aningaasarsianit akileraarutit pillugit inatsisartut inatsisaata allannguutissaatut inatsisartut inatsisissaattut siunnersuummut matumani siunnersuummut peqatigitillugu saqqummiunneqartumut tamakkiisumik innersuussutigineqarsinnaasumut atatillugu isigineqassaaq.

Aningaasarsianit akileraarutit pillugit inatsisartut inatsisaata allannguutissaatut siunnersuutip pissuseqataanik siunnersuummi matumani siunertarineqarpoq suliffeqarfiit erngup sermillu avammut nioqqutissatut atorineqarnissaat siunertaralugu ujarlernissamut iluaqutiginninnissamullu akuerineqartut aatsitassat pillugit inatsit malillugu akersissuteqarfigineqartunut akileraarutitigut naligiissilernissaat.

#### 2. Inatsimmut siunnersuutip imarisaa

Siunnersuutigineqarpoq suliffeqarfiit erngup sermillu avammut nioqqutissatut atorineqarnissaat siunertaralugu ujarlernissamut iluaquteqarnissamullu akuerineqartunit aningaasarsianit iluanaarutinillu akileraarutit landskassimut nakkartassasut. Tamatumuuna isiginiarneqarpoq sermimik imermillu nunanut allanut nioqquteqarneq aatsitassanik piaanertulli inuiaqatigiit pinngortitamit isumalluutaanik tunngaveqarnerat. Sermimik imermillu nunanut allanut tunisinermi akileraarutitigut iluaraarutaajumaartut inuiaqatigiinnut tamanut iluaqutaanissaat pitsaanerpaamik qulakkeerneqarsinnaavoq isertitanit iluanaarutinillu akileraarutit landskarsimut nakkartarata.

#### 3. Pisortanut aningaasatigut allaffissornikkullu kingunissai:

Inatsisissatut siunnersuut isertitat annertussusiannut imannak sunniuteqassanngilaq.

Ingerlatat matuma qulaani taagorneqartut ilisarnaatigaat piffissamik sivisuatsiaamik atuiffiusarmata pilersaarusiormi ujaarlernermi taamatullu tunisassionertaviani/iluaquteqarnermi, taamaammallu maannaakkut qanoq isertitaqarnissaq erseqqissumik kisitsisitalerniarnissaa assut ajornakusoorluni.

Isertitatigut piffissaq ungasinnerusq eqqarsaatigalugu sunniutissat sunniuteqarnissaanut imermik sermimillu avammut tuniniaanermik ingerlatani qanoq annertutigisumik ineriartortitsineqaannarsinnaanissaa annertuumik apeqqutaassaaq.

4. Inuussutissarsiortunut aningaasatigut allaffissornikkullu kingunissai:

Inatsimmut siunnersuut inuussutissarsiortunut aningaasatigut allaffissornermullu sunniuteqassanngilaq.

Aningaasatigut sunniutissai isertitatigut piffissaq ungasinnerusq eqqarsaatigalugu sunniutissat sunniuteqarnissaanut imermik sermimillu avammut tuniniaanermik ingerlatani qanoq annertutigisumik ineriartortitsineqaannarsinnaanissaa annertuumik apeqqutaassaaq.

5. Avatangiisinut pinngortitamullu kingunissai:

Inatsisissamut siunnersuut avatangiisinut pinngortitamullu sunniuteqassanngilaq.

6. Allaffissornikkut innuttaasunut kingunissai:

Inatsisissamut siunnersuut innuttaasunut allaffissornikkut sunniuteqassanngilaq.

7. Naalagaafeqatigiinnermut namminersulernermullu tunngasut:

Inatsisissamut siunnersuut naalagaafeqatigiinnermut namminersulernermulluunniit ingerlatsinnermut attuumassuteqanngilaq.

8. Pisortat kattuffiillu tusarniaavigineqarnerat:

Siunnersuut ukununga tusarniaassutigineqarsimavoq:

KANUKOKA, Kalaallit Nunaanni Sulisitsisut Peqatigiiffiat (GA), ILIK, Nunaqavissut Suliffiutillit Kattuffiat (NUSUKA), Sulinermik Inuussutissarsiuteqartut Kattuffiat (SIK), KNAPK, Inuutissarsiordermut, Suliffeqarnermut Inuutissarsiutinullu ilinniartitaanermut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik aamma Aatsitassanut Pisortaarfik.

Tusarniaanermi akissutit Akileraartarnermut Akitsuutinullu Ataatsimiititamut ingerlatinneqarput.

Kalaallit Nunaanni Sulisitsisut Peqatigiiffiat aamma ILIK allannguutitut tamakkiisumik isumaqataapput.

SIK, Aalisarnermut, Piniarnermut Nunalerinermullu Naalakkersuisoqarfik aamma Inuussutissarsiornermut, Suliffeqarnermut Inuussutissarsiutinullu Ilinniartitaanermut Naalakkersuisoqarfik siunnersuummut oqaaseqaatissaqannginnerarput.

Tamakkua saniatigut tusarniaanermut akissutinik allanik tigusaqartoqarsimanngilaq.

## **Aalajangersakkanut ataasiakkaanut oqaaseqaatit**

### *§ 1-imut*

Nr. 1-imut.

Siunnersuutigineqarpoq aningaasarsianit akileraarutit, tamatumani ilanngullugit akileraaruserinermik ingerlatsineq pillugu inatsisartut inatsisaanni §§ 27 aamma 43 malillugit sermip erngullu avammut nioqqutissatut atorneqarnissaat pillugu inatsisartut inatsisaat malillugit selskabinit suliffeqarfinnullu pisinnaatitaasunit iluanaarutinit akileraarutit, erniat, tapit, landskassimut nakkartassasut.

### *§ 2-mut*

Siunnersuutigineqarpoq inatsisartut inatsisaat 1. januar 2009-mi atortuulissasoq.